



## Pers- en Propagandakemissie Vastelaovesvereniging "De Wien"

### **Historische gegaaves euver de P&P:**

Beej de oprichting van Vastelaovesvereniging de Wien in 1967, woort d'r ouk de Pers- en Propagandakemissie operich.

De ièrste veurzitter waas Louis Borremans †.

De redacteur van de Alde Feep waas Baer van de Meij † van 1967 wies 1978.

De opvolgers van de ièrste veurzitter ware respectievelijk:

Wiel van Aarssen, Alex Peters †, Ans Seelen en Anneke Vullings.

Lei Knoops haet 't veurzitterschap in 1997 wies 2012 euvergenaome van Anneke Vullings. Vanaaf 2012 is Leon Helgers ózze veurzitter.

De ièrste Alde Feep woort oètgebrach in jannewari 1968, wie Jan Christis de ièrste Wienprins waas. In 't 22-jäörig jubileumjaar van 1989 woort d'r ein extra jubileum-oètgabe van de Alde Feep oètgegaeve.

Beej 't 33-jäörig bestaon van de Wien in 2000 woort 'n Jubileumbook oètgegaeve.

In dit jubileumbook staon alle prinse t/m 't jaar 2000, en 'n stökske veurgeshiedenis van de Wien beschreve.

In oktoeëber 1999 woort d'r veur d'n ièrste kièr ein info-bukske oètgegaeve. Heej in stónd alle informatie euver de kemissies van de Wien en ouk euver de programma's zoeëas ze idder jaar gehalde woorte. De bedoeling van dit bukske waas um mièr reklame veur de Wien te make en dao door mièr leje te kriège. Dit bukske waas de veurluiper van de Wienwièzer.

Noow wuurt de Wienwièzer jaorliks tweeë kièr oètgegaeve, d'r waas duudelik behoefte aan mièr informatie euver de evenemente en de programma's.

De naam van de Wienwièzer is door middel van ein oètgeschreve wedstrièd verkregene en door Gerard Seelen gewónne.

Ein belangrièke umschakeling veur de Alde Feep waas 't jubileumjaar 2000.

Ièrs zoel allein veur 't jubileumjaar 't formaot gewièzig waere.

Maar umdet dit met drökke kostebesparend en hanteerbaarder waas, zien weej beej deze gruuëtte gebleve.

Medio 2008 woort d'r beslaote ein nieje en moderne website te make.

Nao inkele vergaderinge en gesprekke, stelde 't bestuur ein budget beschikbaar.

Drökkerie Knoops kreeg de opdrach um ein nieje opzet heejvan te make.

Op 26 november 2008 ging deze nieje website de lóch in.

Jos Alberts woort as ierste webmaster aangetrokke.

In 't jaar 2012 ging de Wien pas ech digitaal. De Wienwièzer kwaam te vervalle en woort vervangen door de digitale niejsbreef. Ouk is het meugelik gemak dat on-line kaarte veur de evenemente besteld kóste waere en betaald.